

**Uunga siunnersuut: Illunut sanaqataaffiusunut taarsigassarsiat pillugit Inatsisartut inatsisaata allanngortinneqarnera pillugu Inatsisartut inatsisaat**

(Illunut sanaqataaffiusunut kommunimit taarsigassarsiat, illunillu sanaqataaffiusunik il.il. aserfallatsaaliuinissamut, nutarterinissamullu taarsigassarsiat tapiissutillu)  
(Ineqarnermut Attaveqaasersuutinullu Naalakkersuisoq)

**Saqqummiussissut**

(Ineqarnermut Attaveqaasersuutinullu Naalakkersuisoq)

**Siullermeerneqarnera**

Illunut sanaqataaffiusunut taarsigassarsiat pillugit Inatsisartut inatsisaata allanngortinneqarnera pillugu Inatsisartut inatsisissaattut siunnersuut, Naalakkersuisut sinnerlugit matumuuna saqqummiuppara. Illunut sanaqataaffiusunut pisortanit taarsigassarsitinneqarsinnaanissaq siunnersuutitigut ajornannginnerulissaaq, taamaalillunilu nunatsinni najugaqarfinni minnerni innuttaasut sapinngisamik amerlanerpaat illutigut imminnut pilersorsinnaanissaannut, namminnerlu illutaarsinnaanissaannut periarfissat pitsaanerulissallutik.

Inoqutigiit appassissumik, akunnattumillu isertitallit qaammammut naleqquttumik, nammanneqarsinnaasumillu akiliuteqartarlutik taarsigassarsitinneqarsinnaanissaat pingaartinneqarpoq.

Illunut sanaqataaffiusunut taarsigassarsinissami massakut malittarisassaasuni piunasaqaataavoq, nammineq aningaasalersuinissami isertitat aallaavigineqarlutik taarsigassarsisoq nammineerluni aningaasalersueqataassasoq, aningaaserivimmiillu imaluunniit pigisanik aalaakkaasunik qularnaveeqqusiilluni taarsigassarsisitsisarfinnit taarsigassarsinikkut nammineq aningaasalersuutissat aningaasalersorneqartussaannerusarlutik. Taamaakkaluartoq oqaatigineqarsinnaavoq, aningaaseriviit aamma pigisanik aalaakkaasunik qularnaveeqqusiilluni taarsigassarsisitsisarfiit aqquutigalugit aningaasalersuinissaq nunami najukkani arlalinni ajornarsinnaasarmat, taamaalillunilu innuttaasut aaqqiissummik atuisinnaanerat killeqalertarmat.

Taamaattumik siunnersuutigineqarpoq, taarsigassarsitinneqarnissaminik qinnuteqartoq nammineerluni 25.000 koruuninik akiliuteqassasoq, namminerlu akiliutigineqartussat aalajangersimasuussasut, qinnuteqartullu inoqutigiittut isertitaannut naleqqussarneqassanngitsut.

Tassunga siunnersuutigineqarpoq, taarsigassarsitinneqartoq inoqutigiittut ukiumut 300.000 koruunit sinnerlugit isertitaqartoq, 300.000 koruuninit amerlanerusunit isertitai tunngavigalugit naatsorsorneqartunik qaammammut akiliuteqartarnermigut taarsigassarsiissutigineqartut akilersussagai. Taarsigassarsisup qaammammut akiliutigisartagai, illunik sanaqataaffiusunik aserfallatsaaliuinissamut, nutarterinissamullu kommunip kingusinnerusukkut taarsigassarsisitsinissaanut imaluunniit tapiissuteqarnissaanut toqqortaatigineqassasut siunnersuutigineqarpoq. Tapiissutissat qinnuteqartunut inoqutigiittut piffissami pineqartumi tamarmiusumik 300.000 koruunit sinnernagit isertitaqartunut taamaallaat taapiissutigineqarsinnaassapput, taarsigassarsiissutissallu inoqutigiit isertitaat apeqqutaatinnagit taarsigassarsitinneqartunut taarsigassarsiissutigineqarsinnaassallutik.

Siunnersuutip tamanut tusarniutigineqarnerani Naalackersuisut kommuninit, illuatungeriinniillu allanit isummersuutitsialannik arlaqartunik, naleqquttunillu tigusaqarput. Illuatungerisat taakkua, Inatsisartullu ataatsimiititaliaat attuumassuteqartut qanimut oqaloqatiginerisigut, suleqatiginerisigullu siunnersuutip inaarutaasumik naammassineqarnissaa Naalackersuisut pingaartippaat, taamaattumillu tamatuma kingunerisaanik 2024-mi upernaakkut ataatsimiinnissami siunnersuummik aappassaaneerinissap tungaanut naleqqussaasoqassasoq naatsorsuutigineqartariaqarluni.

Taamatut oqaaseqarlunga Naalackersuisut sinnerlugit immikkoortoq Inatsisartuni kajumittumik suliassanngorlugu tunniuppara.